



平閩紀卷之四目錄

箋啓

飛調官兵啓

飛調官兵覆啓

延平兵不便發回啓

用荷蘭議啓

遣發興鎮兵啓

統兵援漳啓

往漳會剿啓

五
月
錄
卷之四目錄
一
緩征東石啓

覆同安兵單啓

啓康親王

密陳平海啓

彙報僞鎮投誠啓

微臣報國心切啓

塘報殺賊啓

塘報剿賊啓

報安營啓

恢復海澄縣啓

恢復廈門啓

彙報招撫投誠啓

清查兵數啓

平閩紀卷之四

懋紹漁山

三韓楊 捷元凱著 男懋緒令鴻纂

懋綸今掌

箋啓

飛調官兵啓

爲亟請飛調官兵事竊照逆賊猖獗攻陷海澄現今
侵犯泉州本職叨受

朝廷重寄恨不星馳撲剿滅此朝食奈所帶官兵爲數無

幾而逆賊擁聚數萬勢甚鴟張非調集官兵多帶砲
火不足以大挫賊鋒本職管見除延建汀邵四府現
有山寇江拐子等響應竊發流突不常恐上游震動
不便輕調外如福清長樂等營俱可移緩就急以濟
目前援剿今查福清營官兵一千名除前經抽調三
百名今現在七百名內應抽調二百名長樂營官兵
一千名除前經抽調二百名貼防福清今現在八百
名內應抽調二百名羅源營官兵一千名除總督調
征三百名今現在七百名內應抽調二百名連江營
官兵一千名未經抽調內應調撥四百名福州城守
三營兵共二千七百名經前抽調四百名尙存兵二
千三百名內應抽調三百名福寧鎮標三營官兵共
三千名并桐山營官兵一千名未經抽調應調二千
名以上共應抽調官兵三千四百名伏乞

王爺俯念泉郡垂危援剿刻不容緩如允本職抽調卽
當遵照飛檄各營照數抽撥多帶火器併飛咨福寧
總兵官親自帶兵尅日到省以便本職統領前往興
化相機策應候大兵到日大舉滅賊事關抽調官兵

本職不敢擅專仰懇

王爺睿鑒速賜行職遵奉施行啓

康親王

康熙十七年七月二十六日

飛調官兵覆啓

爲啓覆事本月二十六日敬奉

王爺令諭內開查福清等營官兵俱經總督先已抽調
赴漳今各營城守所存無幾諒無可再調之兵其福
寧總兵官黃大來前經總督屢啓調發本親王以省
城爲重不便遣發今該提所啓各營官兵尙未清查
卽如長樂一營先調二百貼防福清後奉本親王又
調五百前赴興化該提俱在未知今所啓各營官兵
應否可調該提逐一再行據實查明啓覆可也等因

到職敬此案照職先以所帶兵馬單薄前途賊勢猖獗恐有衆寡不敵之虞具啓

王爺請調福州城守并長福連羅以及福寧鎮標銅山營各處官兵三千四百名帶領前進今敬奉

令諭以職所啓各營官兵尙未清查再行據實查明啓覆等因但職初到閩省凡衙門卷案數目及經承人役俱係前任提督段帶往海澄今現在書役數名亦只就經制兵數約畧開筭其各營之現在細數實所未知除長樂營官兵今遵奉不調外如福清營應

調之二百名連江營應調之四百名因該營現在兵數未據冊報無憑查筭然大約缺額不多俱應照原啓之數抽調羅源一營近據該營守備余福冊報現在兵丁九百九十名除調往漳州三百二十三名現兵六百六十七名亦應照原啓抽調二百名至於福寧鎮標及桐山營近據各該將領劉濟源等冊報現在兵丁三千八百四十名亦應照原啓調兵二千名併令該總兵統領來省其福州城守三營雖未據該副將冊報實數近處

王爺赫濯之下諒可無恐亦應照原啓抽調二百名以
上福清連江羅源福寧并福州城守各營共應調兵
三千一百名職豈不知閩省沿邊各營在在需人扼
守惟是今日泉州被困勢在萬分危急賊衆數多人
心搖惑而職所帶兵馬爲數有限若於各營移緩就
急候大兵到日一齊奮勇直前大挫賊鋒則泉州之
圍旦夕可解倘不亟調各屬之兵則無兵可調猶豫
耽延賊衆之烏合愈多官兵之志慮益懈稍有不虞
則全閩之大事去矣海疆安危在此一舉今敬奉前
因職不得不懇切啓覆伏乞

王爺睿裁賜示施行

康熙十七年七月二十七日

延平兵不便發回啓

爲啓覆事本月初三日奉

王爺發下延平城守副將康泰啓本二道并奉

令諭交發提督敬此該本職遵查啓內所報尤溪大田

二縣毗連德化聞逆賊聚衆在赤水欲來侵犯城汛

兵單乞將守備宋希聖所帶兵丁三百名發回以備

防禦等情竊照守備宋希聖等官兵先經本職啓明

王爺發回一百名隨令把總龐友帶領協防大田尤溪

去後再查延平二營兵數據副將冊報實在兵丁一

千九百六十二名內除調往漳州六百八十二名留
省二百名現在該府縣汛尚有實兵一千零八十八名
際此多事之時該副將身在地方自當酌量險易移
緩就急通融扼守以保萬全何得執定發回宋希聖
所帶兵丁二百名方足分堵要口且目下泉州被圍
勢甚危急本職以兵力單薄懇切具啓荷蒙

王爺俯鑒准調各營官兵并力南下現在檄催齊集何
等緊急查各營俱係邊海要地處處需兵惟以酌量
緩急勢不得不嚴檄調撥若各營俱如副將康泰之
屢次混瀆則通省無一兵可調將泉州之圍可坐視
不救耶伏乞

王爺大奮睿斷飭行副將康泰於實在兵丁一千八十
名之內酌量調遣策應扼防務保萬全如藉口兵單
致有疎虞請祈

王爺威靈治罪施行

康熙十七年八月初四日

用荷蘭議啓

爲稟明下情懇乞

題請事本年九月二十七日敬

奉

王爺令諭內開准兵部清字咨開該議政王會覆福建
巡撫吳 具題前事查得巡撫吳 奏稱荷蘭國馬
珍西氏稟稱夾板船到閩隨即貿易如有順風卽令
發回等語相應將現到船隻令其貿易如伊要回卽
令發回稟內又稱必得覓一空閑之地蓋房居住除
奉禁貨物之外其餘聽憑貿易并請給

勅如有用本國之處於何年用差遣何事亦應請

勅書內註明等語大將軍康親王等身在地方或於目前用荷蘭國之兵夾剿海賊或於何年定期用荷蘭國之兵夾剿金門廈門等處問明馬珍西氏定議具

題到日給

勅并空地蓋房及嗣後作何貿易之處再議具

題可也康熙十七年九月初七日 題本日奉

旨依議欽此欽遵抄出到部擬合就行到本親王准此合行諭知該提卽將水師曾否招齊船隻曾否備足今荷蘭國官兵應於何時調用在於何處夾剿速將此等事宜確議啓覆本親王以憑再加會議

題覆可也爲此特諭等因到職敬此竊照本職自江南帶兵到省時因泉城被圍日久急於應援隨卽整旅南下力解泉圍拮据行間兩月於茲其於水師之曾否招齊船隻曾否足用尙未及周知至於荷蘭國官兵應作何調用令其何處夾剿本職到閩日淺尤未深察其腹心情形未敢輕率啓覆况招集修理水師船隻及調用荷蘭國官兵俱係撫院

題請今奉前因除現在就近移咨撫院商議容議妥移
覆到日另文啓覆外合先具啓伏乞

王爺睿鑒施行

康熙十七年九月二十八日

遣發興鎮兵啓

爲諭知事本年九月二十八日敬奉

王爺令諭內開據興化鎮總兵官劉德懋啓報湄州有
賊船二百隻內有大桅船八隻水陸賊兵俱剽湄州
滿山上俱是帳房約有一二萬衆議定水陸齊進黃
石涵頭業經三啓殿下遣發官兵來興防守未蒙遣
發職何敢再四瑣請但事在危急之秋不得不涕泣
相告伏乞俯念興化一郡爲下游咽喉城內兵單至
極迅賜諭行提督楊 將職標留泉官兵遣發回興

等語照得該提爲福建全省重寄何處當多兵固守
何處當酌量調撥應從長計議務保萬全其在臬官
兵亦不爲少今屢據劉德懋啓報情由合行諭知該
提或以興郡緊要應將興鎮留臬標兵速行遣回或
以興郡爲不足慮亦聽該提酌量而行可也爲此特
諭等因到職敬此案照先准興化總兵劉德懋咨報
海寇聯踪湄州上山劄營欲犯府城等因業經本職
會商巡撫於九月二十一日一面遣發興化鎮標右
營遊擊陳永茂并撫標隨征總兵張韜共帶官兵一
千名前往興化應援一面各差官星夜馳往興化探
聽逆賊情形續據差員回稱查得興化沿邊並無海
賊上山劄營亦無大船賊艘并據防守涵江撫標隨
征總兵陳欽塘報海逆情形相同本職隨經移明總
兵劉德懋嗣後務將賊情偵探確實咨報勿得輕聽
浮言在案今奉

王爺令諭前因本職自當敬遵酌量遣發但洛陽橋惠
安縣二處乃邊海要緊汛地兼惠安尚無城垣若防
守兵單何以彈壓容俟再查海賊動靜作何向往有

無豕突之息另爲調遣可也合先啓覆伏乞

王爺睿鑒施行

康熙十七年九月二十九日

統兵援漳啓

爲咨會事本月初五日卯時准寧海將軍喇 咨開
照得本月初四日有

王爺發來鈞諭諭副都統查音布卽將四路兵馬挑選
帶往漳州進剿提督石 總兵黃 官兵仍同前往
其提督楊 乃係福建全省重臣泉州係是緊要之
地去與不去聽該提督自行酌量等因則是福寧鎮
黃總兵乃係奉令往漳進剿之員今現同貴提督在
東石剿賊或俟東石賊平前往漳州或彼處兵力已

足卽令馳赴漳州統候貴提督酌量遣發可也等因到職准此竊照東石地方久被賊踞前同巡撫吳與祚會商發兵進剿先遣邵武副將郭奇等帶兵先行攻剿去後嗣巡撫於初三日起行本職於初四日領兵前進間據副將郭奇等報稱巡撫已將撫標遊擊呂八音福清遊擊朱翰原帶官兵一千名掣回帶往漳州去訖今本職看得東石一寨逼近海邊雖應剿滅第三面皆海數年以來築城挑濠恃險拒敵一時難以攻克且不過彈丸之地今總督姚啓聖咨稱逆

賊大夥俱在漳州屢催滿漢大兵會剿茲副都統查音布已奉

王爺令諭同浙提石調聲總兵黃大來齊往漳州茲泉州雖係緊要重地但現有寧海將軍喇哈達同副都統楊鳳翔統領滿漢官兵駐守至漳賊未平本職亟應前赴剿除現將隨帶官兵同副都統查音布等馳往漳州會剿其東石一寨俟剿滅漳賊之後再行攻取亦未爲遲理合啓明伏乞

睿鑒施行

康熙十七年十月初六日

往漳會剿啓

爲啓報往漳會剿海寇事竊照東石一寨乃海賊運糧要地先經寧海將軍同查都統吳巡撫與本職商議應先行攻取然後南征隨於九月二十八日遣發撫標遊擊呂八音及職標遊擊王景張念祖并各協營官兵共三千員名委令邵武副將郭奇總統前往攻打東石續據副將郭奇等稟稱此寨三面臨海只西北一面通岸路官兵到彼下營賊卽用砲打出我兵亦發砲打進兩下相持奈路窄難以進攻具稟請

示間續因總督移咨請兵吳撫院於十月初三日隨將攻取東石撫標遊擊呂八音福清營遊擊朱翰并所帶兵丁調掣隨帶往漳面會總督去後初四日本職選帶官兵并運大砲蘆囤往攻東石因詢據各將弁皆云東石雖一彈丸小寨奈逼近海邊所開河溝與海潮相接只一面通陸路官兵攻打無可用力之處且又准總督催請往漳等因本職隨於初五日將大砲蘆囤發回泉州於初六日帶領官兵先往漳州會剿劉國軒等賊已將緣由啓明

王爺在案初六日本職在沙溪下營又准總督咨爲十請泉州官兵會剿海賊事移催本職速赴漳州會剿并據副將郭奇遊擊王昶各稟稱奉總督行調該將等立刻往漳如再遲延定行先拿後叅等語各將領恐爲總督叅拿懇請各准帶兵南下本職因此二枝兵馬原係總督發隨寧海將軍應援泉州之兵未便固留准其去訖本日又准寧海將軍咨留本職回守泉州咨內備敘奉有

王爺令諭泉州係緊要之地提督有全省之責應否往

漳聽本職自行酌量等因但本職細思泉州雖係緊要重地現有寧海將軍并楊副都統彈壓且有綠旗各營官兵三千員名本職尚恐不敷防守又撥福州城守千把總王烈楊宗錢有功等官兵二百八十名回泉添防自可無意外之虞今漳州現有賊首劉國軒等大寇在彼窺伺且總督十次移咨諄切請援而本職忝有全省責任似當赴漳會商進剿俟事平回泉再剿東石小寇亦未爲遲除現在率兵南下并咨覆寧海將軍外理合啓明伏乞

王爺睿鑒施行

康熙十七年十月初九日

緩征東石啓

爲諭知事本月十一日奉

王爺令諭內開據寧海將軍啓請再諭撫提速回東石
剿殺逆賊等語照得該提身任全省重寄何處緩急
自應籌畫調度今東石地方現有逆賊且離泉不遠
若泉州或有可虞之處該提卽當酌量發兵將東石
逆賊速行剿平以清泉州肘腋之患或以東石爲不
足慮官兵卽可赴漳亦俟剿滅漳州逆賊之後該提
當作速回泉保固地方總之該提身在地方自知緩

急情形茲據該將軍啓報前因合行諭知該提酌量而行可也爲此特諭等因到職敬此案照攻取東石情形業經本職啓明

王爺在案續因總督疊咨請兵本職又不得不帶兵南下今已於十一日到長泰縣過河十餘里下營十二日可到漳州俟到漳面會總督巡撫商議應作何進剿另啓馳報倘仰邀

王爺威靈得早奏膚功自當星速回泉再剿除東石之寇也今奉前因合先啓覆伏乞

王爺睿鑒施行

康熙十七年十月十二日

覆同安兵單啓

爲特諭事本年十月二十日敬奉

王爺令諭內開據寧海將軍喇哈達啓報海寇復犯同安已被侵佔杭協副將馬化龍等俱退回泉州府等語照得泉州屬縣原係緊要而同安一邑尤須多設官兵加謹防禦是以本親王前諭有提督統轄通省應否赴漳該提當自爲酌量而行今該提並未前後籌畫竟自赴漳以致同安失陷該提爲通省重寄自當籌畫周詳不得似此疎忽今於文到之日作速遣

發官兵恢剿同安平復之日仍須多撥官兵嚴加固
守毋得如前輕視可也爲此特諭等因到職敬此案
照十月初四日據副將馮昭京報稱海賊吳淑率領
賊衆數千於十三日從石灣地方登岸搶糧離縣十
餘里該副將會同杭協副將馬化龍率領官兵前去
堵禦我兵奮勇冲擊殺死賊衆一百餘名被傷賊衆
二百餘名奈賊夥數多我兵單薄衆寡不敵隨冲圍
殺出因同安縣城先經被賊推平至今尙未修築無
城可守隨將兵馬抽割梵天山副將馬化龍將兵馬
復帶回泉州逆賊亦卽退回上船而去但同安要地
請添兵設防等情隨經本職面商督撫挑選馬步精
兵四千五百名於十五日馳往同安添防隄備海賊
聞風立卽開船遠遁仍回海澄去訖該本職復細查
逆賊吳淑帶衆在石灣海邊搶糧離城十餘里實未
到縣且城垣未築人民俱未歸家官兵無城可守因
衆寡不敵退割梵天山原非失陷城池今奉

王爺令諭前因理合據實啓覆伏乞

睿鑒施行

康熙十七年十月二十一日

啓康親王

爲機有遲速等事本年十一月十七日准 兵部密
劄該議政王等會覆福建提督楊 題前事等因康
熙十七年十月初十日題十一月初一日奉

旨議政王貝勒大臣會議具奏該臣等會議得福建提督
楊 疏稱臣率領江南帶來原兵并福建提標官兵
七百餘名長驅赴漳到同安縣地方忽接督臣疏稿
以爲屢調不至坐失事機等因具題當海寇圍困泉
城聲勢洶洶之際急于奔援者機有不可遲也及泉

圍旣解臣未克速往者實因餘氛未靖倘不圖善後則漳泉兩郡勢皆不可爲臣今現在漳州與督臣面商進剿機宜務期文武和衷掃蕩群寇以紓

皇上南顧之憂斷不敢稍存圭角等因查近經臣等會議總督提督俱係封疆大臣嗣後總督提督等若有調度綠旗官兵之處一面卽聽伊等酌量調遣而行一面具啓知會

大將軍王等至總督提督等俱係

朝廷倚任封疆大臣必于地方事宜籌畫有益和衷共濟等因具

題行文在案今提督楊 疏稱臣今見在漳州與督臣面商進剿機宜務期文武和衷掃蕩群寇以紓

皇上南顧之憂斷不敢稍臣圭角等語適符大典相應

勅下提督楊 總督姚 和衷共濟同心一意速行勦滅海寇以靖地方可也等因康熙十七年十一月初二日題本日奉

旨依議欽此爲此合劄該提督欽遵施行等因到職承准此除欽遵外理合具啓伏乞

王爺睿鑒施行

康熙十七年十一月二十日

密陳平海啓

爲密陳平海機宜等事本年四月二十五日准

兵部密咨內開該議政大臣等會覆 和碩康親王

劄授副將原福建安溪縣武學生員李日成 奏爲

密陳平海機宜仰祈 睿鑒採擇事臣草茅微賤生

長閩陬緣閩海煽亂臣親姪光地密與臣謀遣人條

奏機宜幸際光復蒙 恩優授侍讀學士去年海逆

攻圍泉州光地復同臣團練鄉兵守禦地方迎接大

師以解泉圍復蒙 恩優授學士并議敘及臣光地

以臣誼當然不敢冒受又以身在制中不敢親詣

闕廷控辭俾臣齎疏代奏隨蒙傳臣到內閣問海上情形
臣已畧陳一二但聞音蹇澁區區之愚未能盡達伏
念臣全家感激

皇上厚恩義不與賊俱生謹臚列滅海數款惟

皇上鑒臣愚忠俯賜採擇一曰嚴海禁逆賊竊踞海島凡
糧食衣甲器械船料等項俱一一取給於內地海界
未遷時沿海居民愚弱者供其搜掠奸巧者潛與交
通故賊得肆行其志自去歲奉

命嚴界士民以手加額謂游鬼可立致釜中乃尙蔓延至
今者緣守禦官兵稀少海寇深入不足以制其鋒致
彼掠取糧物如故臣愚以爲宜添設綠旗官兵照依
原遷沿海舊堡多人守防一堡寇至則附近諸堡相
爲救援有不用命者置之法至於內地奸民有陰爲
接濟者一經拿獲立置重典務使一絲一粒絕不相
通不過數月彼衆將自潰矣然利之所在走死如鷲
無論奸民交通卽防守將弁保無有貪利行私而陰
與爲市者是宜專責督提諸臣嚴加清察勿徇情面

使人人知通海有不赦之條則犯者自寡此不勞而滅賊之第一策也壬寅癸卯年間行之已效惟在着實禁防不則空有遷界之名無益也一日杜招撫海禁既嚴賊糧既絕駸駸乎有不能自存之勢矣爾時必有倡爲招撫之說以怠我師者卽我師久頓海濱或亦利於撫以爲可庶幾成事也不知海賊萬不可撫議撫亦萬不能成且一次議撫卽一次墮其奸計如順治甲午年間會議撫鄭成功矣乃議撫不成而彼乘我弛備突犯泉漳外縣俱被攻陷去年又議撫

鄭經矣亦議撫不成而彼乘隙攻陷海澄圍困泉州幾於不守此議撫之明鑒也况內地奸民反側無常一聞議撫以爲海賊將復得志也則群趨而附之是議撫爲海賊樹幟也且海賊卽受撫肯遂散其黨夥乎我師遂可撤回乎徒長賊人之志熾奸民之心墮國家之體甚無利也臣愚以爲宜一意進剿絕議招撫則人無附賊之心而滅除之易易矣一日選水師水師之帥宜得其人也海逆經今三十餘年未能撲滅者緣彼恃海爲險我無慣練水軍以搗其巢穴故彼

得以內無顧忌而外肆鴟張乘我師之在漳也則揚帆而至泉而泉城被圍矣迨我師之援泉也又揚帆而至漳地而漳地被擾矣彼以逸待勞我疲於奔命可謂計之得乎况我既嚴海禁以絕彼糧食彼勢不能坐而待斃必將大舉登岸以與我師相抗衡勝負之機未知所定惟有習海之將統率舟師一軍直取廈門以攻其腹心一軍趨據澎湖以斷其歸路則彼首尾不能相顧未有不立見授首者故為今日之計莫急于舟師而舟師之任莫要於得人見今滿漢諸大帥俱係方畧宿望臣豈敢謂非其人然而水陸異宜以北人而出沒於波濤洶湧之間未見其為全利也必得平日熟於泉漳水道兼威望素著又深悉海賊伎倆者以為帥始足寒賊膽而操必勝是在

皇上細加詢訪苟得其人則逆賊之根株可以斬絕而閩海從此永定矣一日商緩急選舟師以滅海誠今日之要著矣然而攻取之法尤有緩急之宜如臣所謂直取廈門以擊其腹心趨據澎湖以斷其歸路此所宜急者也悉力以攻海澄此所宜緩者也蓋海澄三

面臨海一面通陸去歲爲賊所陷賊復掘斷陸道通引海潮則此一箇之陸復成巨浸且城小而堅無人民之聚粟米之蓄賊之糧運直從海道相通是彼得之易爲守我失之難爲攻也若欲急於恢復頓兵相拒曠日持久兵疲糧費而無損於賊之毫末計之至拙者也臣愚以爲莫若以攻海澄之力徑取廈門澎湖則逆孽必遁而海澄在吾掌中矣說者謂海澄乃廈門要地欲取廈門必由海澄此不知海者之論也我之舟師自同安以抵漳州處處俱可入海惟患提調水師之無人耳苟提調得人何必區區爭一海澄以爲入海之路兵法舍勞而就逸故緩急不可不議也一日急撫緩聞之民爲邦本本之不固斯爲元氣之憂欲以息亂而亂不可息閩民自甲寅之變遭海寇荼毒者三年矣開復以來荷

皇上蠲免租稅父老感泣喜見天日然時當用兵之際徭役輸將亦勢所不能無惟在去其太甚則民受其賜如兵行則用民夫此用夫之不得已者也然保無有過爲虐索之弊乎有兵則有糧此買糴之不得已者

也然保無有侵沒之弊乎

皇上明見萬里自能深知此中情弊無庸臣言惟願嚴加申飭買糴必使民沾實惠用夫毋得過濫夫額將弁不由有司不得擅索夫役擅派草料旗丁不得藉口鋤草等項虐索民夫有司不得有無名之徵奉一派十如此休養生息則民感再生之恩必不肯挺而走險而作賊者寡矣如是而尙有嘯聚山林與海逆遙爲聲援者此亂賊之尤法當剿殺奸民除而良民益安止亂之道莫善於此以上五款俱係滅賊機宜緣臣有一得之愚兼詢之輿論不揣密陳字多逾格貼黃難盡伏祈 睿鑒施行等因康熙十八年四月初四日具奏本月初九日奉

旨這本內事情議政王貝勒大臣會同確議具奏欽此該臣等會議得劄授副將李日成條奏內稱宜嚴海禁杜招撫選水師之帥直取廈門趨據澎湖宜急攻海澄宜緩買糴必沾實惠用夫毋得過濫五款俱於破滅海賊撫綏人民似有大益查近經奉

旨特以岳州總兵官萬正色在洞庭剿逆著有勞績令其

選帶伊標官兵赴閩將破滅海賊恢取廈門等處事宜與大將軍康親王該督提等會商而行已經行文除水師之帥宜得人一款無庸議外其餘各款全錄行文大將軍康親王及叅贊大臣該總督將軍巡撫等將作何舉行可以速破海賊以救災黎平定地方逐一詳議妥確速行具題可也等因康熙十八年四月十一日題本日奉

旨依議速行欽此等因到職准此理合具啓伏乞

王爺睿鑒施行

康熙十八年四月二十六日

彙報偽鎮投誠啓

爲彙報偽鎮率衆投誠仰副招撫德意事案據同安
城守左營遊擊王大有報稱節奉本將軍憲令仰職
相機勦撫鄭不伐不得稍有疎畧墮落賊計等因奉
此緣照卑職奉令提兵進勦山寇鄭不伐於正月二
十七夜進圍逆寨屢次堵截盜糧殺敗賊衆得獲大
旗火藥器械仍活擒全髮賊夥俱經解報同安馬總
兵轉報及彙報外仍復多方設伏狡賊偵知莫敢下
山接運食盡衆飢鄭不伐計無所出二月十八日始

遣員下山請撫卑職隨宣布

皇仁使其欣歡効順十九日復遣僞坐營中軍鄒其昌赴漳面陳輸誠續奉憲臺頒發旗幟銀牌花紅到寨卑職卽催起行而鄭不伐藉夫米不到游移未決忽於二十四午掌號起營卑職登卽帶兵接踵追行由山路至漳竭力隄防多方招致於二十九日引至軍前投見理合稟聞又三月十六日據投誠僞木武鎮都督僉事陳士愷呈稱卑職帶到轄下官兵及隨附文職共一千四百八十六員名所有隨帶僞令諭三十

九道銅關防五顆關記一顆業繳 總督部院外理

合備造清冊呈繳又五月初九日據泉州城守叅將傅成報稱案奉本將軍憲牌指授方畧務將逆賊楊尾黃高郎相機勦撫在案又於本年四月二十一日奉 寧海將軍喇 令牌爲軍務事內開據泉州府

報據南安縣報稱逆賊楊尾黃高郎屯聚十六十七等都派劫等情據此合行撫勦備牌仰職卽便帶領所轄官兵親自統率協同浙江撫標守備郭維忠湖協守備張大謨各率本標官兵前往南安相機勦撫

等因又仰泉州知府蔣毓英通判段炳然并令晉江
南安二縣知縣調領鄉練民兵協同前往勦撫奉此
卑職帶領各營官兵卽於四月二十二日進至南安
洪瀨地方探賊衆已離十六七都天晚扎營密行前
探續探稱賊衆楊廷彩黃伯屯住十五都隨於二十
三日辰時率兵前進由十六七都趕至十五都賊又
移去至二十四日又探得賊屯寶塔山踞險分兵佈
禦卑職慮賊衆恃險一路難於奏功隨分兵四路扼
要並進卑職率領本營把總趙吉楊玉高等原委把
總王三桂有扎守備楊三元隨征外委守備傅國鼎
領旗把總朱成龍王奎王尚武等外委把總周世榮
蔣旭百隊陳義謝輝等投誠總兵高起勝副將王成
叅將黃陵功加遊守千把陳斌忠陳地李振等浙江
湖協守備張一謨率領湖標千總段敬亭把總林尙
外委把總陳貴周得祿等隨征監生張浩候選府經
歷張振遠紅旗李萬春張徵馮二百隊王才李秋等
浙江撫標守備郭維忠率領本標千把總田鰲鄧國
明李應彪外委把總王瑞福王進忠等南安知縣鄭

天倫城守營千總張文福等率領鄉練洪挺等四路
各逼寶塔山見賊屯住山頭分兵佈禦卑職密傳四
路齊進奮勇協圍兵刃交加四無去路勢逼來歸方
講投誠卑職等見其賊衆甚多適大雨傾盆天又將
暮遂允其投誠有偽藩前親軍船樓前鎮總兵官都
督同知楊廷彩當繳到偽劄一張銅印一顆轄下偽
行營叅軍督理糧餉監軍道副使吳大義偽劄一張
銅印一顆偽領兵正中軍副將梁天貴偽劄一張銅
印一顆偽坐營正中軍劉光祖偽劄一張銅印一顆
偽旗鼓正中軍張芳劄一張偽隨征營將方祿劄一
張偽驍翼營將蔡榮和劄一張偽火攻營將康春劄
一張偽隨征協將施忠劄一張偽領旗協將王邦俊
劄一張偽中協副將楊勝劄一張銅印一顆偽後協
副將陳志劄一張銅印一顆偽中協中軍張良委牌
一張偽中協正領許旺委牌一張偽右協正領尤文
正委牌一張偽後協正領柯勝委牌一張偽後協副
領葉元科委牌一張內偽總理候缺將蔡宗委牌一
張另繳染病未到後協將吳連劄一張又一鎮偽援

勦中鎮總兵官都督僉事黃伯劄一張銅印一顆僞
坐營副將李芳劄一張僞左營副將呂輝劄一張銅
印一顆僞右營副將林舉高劄一張銅印一顆僞中
營副將戴勝劄一張僞前鋒營副將江龍奮劄一張
於四月二十五日卑職等率領僞官兵復回洪瀨溪
埔札營隨即稟請本將軍憲令並寧海將軍喇 憲
示登奉 令牌內開爲照該將等進勦海寇不費一
矢而楊尾黃高郎等傾心歸誠具見文武同心調度
有方深可嘉尚其楊尾黃高郎二股兵目卽令守備
郭維忠張大謨率領該標官兵護送進城尚逆賊蘇
樑等一股兵目該將卽便帶兵前進招撫前來等因
又奉將軍喇 令牌遣發浙江督標千總孫尚義把
總唐魁等官兵協同招撫蘇樑等奉此卑職遵將守
備郭維忠張大謨率領該標官兵護送楊尾黃高郎
等僞官兵進城就近叩見寧海將軍喇 外卑職卽
於二十六日從南安帶領本營把總趙吉楊玉高等
有劄守備楊三元隨征外委守備傅國鼎領旗把總
朱成龍王尚武嚴勇王奎外委把總黃用黃貴馮朝

榜等功加遊守千把陳斌忠陳地李振等浙江督標
千總孫尚義把總唐魁等戎旗把總陳貴等各官兵
再往晉江四十四都招撫海賊蘇樑等一股僞官兵
歸誠隨差百隊曾明領旗薛茂蘭隨征守備黃玉武
舉王興邦投誠副將何承珪把總趙吉及府廳縣差
丁前往宣諭招撫卑職奉令卽督率各營官兵前進
於四月二十九日僞副總兵蘇樑等赴職就撫先繳
僞銅印四顆僞劄二張卑職隨於五月初一日督催
僞官兵下山初二日撫齊僞官查有僞中提督左鎮
左營副總兵蘇樑計銅印一顆劄一張僞中軍叅將
林材銅印一顆劄一張僞左翼叅將吳英印一顆僞
右翼叅將黃盛印一顆又探有逆將周魁率兵潛伏
晉江四十四都卑職隨令武舉王興邦宣諭 憲臺
招徠弘仁旋卽就撫繳到僞援勦左提督右鎮前營
副總兵周魁僞劄一張到職卽於初三日早帶領僞
官兵進城卑職隨將各僞官引見寧海將軍喇 蒙
將僞官僞兵各發泉州府當堂削髮安插已上通共
三鎮計僞官二十九員僞兵五百四十七名內未歸

農兵三百四十名登請歸農兵二百零七名所有偽印十三顆偽劄二十二張偽委牌六張俱蒙寧海將軍發交泉州府收繳其高照大旗名旗共二十二桿并排鎗片刀藤牌長鎗鑼鼓號頭甲械亦卽交收府庫外合將招撫過偽三鎮將全旅歸誠查明實在官衙員名及偽兵偽印劄數目理合塘報爲此具報各等情到職據此爲照閩省未寧由於山寇海逆勾連交訖欲除海逆必先肅清山寇職統師鳳山晝夜與逆首劉國軒等對壘而於泉屬各山寇刻刻經心有僞牛宿鎮鄭不伐卽鄭奇烈嘯聚亡命依附海逆踞險跳梁流毒漳泉各邑爲害已久隨經本職咨會總督檄發原晉江營遊擊韓元朗同安城守左營遊擊王大有洛陽橋遊擊趙雲密授方畧合師夾擊剿撫並用去後鄭不伐見我官兵攻圍迫急設計詐降覬圖就計逃遯復經本職嚴檄遊擊王大有跟踪尾追相機剿撫鄭不伐被我兵追急隨同差官到營輸誠又有僞鎮紀朝佐楊尾黃高郎等盤踞南安永德各縣沿鄉肆劫荼毒生靈并經本職咨會督撫檄調駐

防德化福州城守左營遊擊韓又琦泉州城守營守
備魏進陞原晉江營遊擊韓元朗酌撥官兵前往南
安一帶地方着令防弁鍾奎督同鄉練李元烈等爲
嚮道會合總兵陳龍等合力夾剿紀朝佐續經總督
專員招撫詎朝佐狡謀多端此剿彼逃復經本職檄
行本標左營遊擊朱起龍帶兵在於大小盈堵截以
防朝佐從東石入海併嚴飭遊擊韓又琦躡跡緊追
朝佐狡請就降又乘間遠遯潛踪於永福之伏口尤
溪永德三縣交界處所遊擊韓又琦登山涉水緊追
至彼堵絕糧道又經本職咨移總督飛檄福延興泉
各城守官兵四出會剿分頭堵截紀朝佐又從永德
沿村仍歸南安舊穴當經遊擊韓又琦追至橫溪斬
殺大挫賊鋒截斷餉道賊情急迫隨爾歸誠其僞鎮
將楊尾黃高郎等亦先經本職飭行泉州城守叅將
傅成等相機勦撫務在掃除以靖地方在案今俱相
繼就撫更有僞木武鎮陳士愷者仰慕

王爺好生德意帶領所轄官兵輸誠向化查陳士愷係
海上有名大鎮茲已率衆挈眷航海來歸可以鼓勸

未來之僞鎮其鄭不伐紀朝佐等皆係山寇渠首今已歸誠雖零星小寇尙未盡淨而渠魁歸服已絕山賊海逆勾通交訁之患此皆

王爺恩威遠播所致查僞總兵鄭不伐帶到僞官共五十三員僞旗手兵丁共七百四十六名又續到二百七十三名僞總兵紀朝佐帶到僞官共六十九員現在僞兵三百名歸農僞兵八百二十九名楊廷彩卽楊尾黃伯卽黃高卽蘇樑三僞鎮共帶僞官二十九員僞兵五百四十七名以上僞鎮副叅遊守弁目俱經本職給賞袍帽靴子花紅銀牌以昭激勸并咨明總督分發隨標安插得所外理合彙齊啓報伏乞王爺睿鑒施行

康熙十八年五月二十二日

微臣報國心切啓

為微臣報國心切等事本年五月二十八日准
兵部咨開等因業經本職啓明

王爺在案茲敬奉 令諭內開前事等因合行諭知該
督提等速為確議啓覆并查照部文內載閩省原經
制綠旗兵及靖南王下兵共有六萬餘名等語該督
等即將前項兵丁備造清冊啓送前來以便

題覆等因敬此為照閩省地方依山阻海沿邊南自廣
東分水關起北至浙江分水關止延袤紆迴二千五

百餘里賊艘飄忽靡常在在皆可登犯此險要情形
久荷

王爺洞鑿不敢再陳惟是海澄一邑現被賊踞金廈等
島逆黨猶繁今一時舟師未備難於尅期搗巢在沿
邊各汛要口必須增設重兵分布堵禦以固邊疆茲
准 部文內開原經制綠旗官兵及靖南王下兵共
有六萬餘名以此兵進取金門廈門等島破滅海賊
等因查康熙二年間進取廈門等島破賊之時雖閩
省共有兵六萬餘名彼時地方全盛海澄未失舟師
齊備兼水兵操演熟練尙有海澄公黃梧遵義侯鄭
鳴駿慕恩伯鄭纘緒慕仁伯陳輝總兵楊富何義郭
義蔡祿楊學臯等共約計兵二萬四千餘名共船四
百六十餘隻更有零星投誠官兵船隻皆係慣習海
戰之水兵尙調紅毛彝船并經制大小戰船將及千
隻共圖夾攻且值僞國姓江南敗遯走死臺灣之後
賊黨解體接踵投誠是以大師一舉方克蕩平嗣後
地方稍寧官兵卽議裁減故十三年變亂實因兵少
處處營伍不能保守地方海賊乘機竊踞漳泉各府

平陽紀 卷之四
蹂躪內地逮十五年大師入閩漸次削平逆孽退居窮島彼時經制初復舟師未設不能直搗巢穴致餘氛倚水跳梁遂成滋蔓前任督提以宇內多事措餉維艱不敢仍請增設以致堵剿乏兵遂至海澄失陷泉郡被圍幸賴

朝廷洪福

王爺方畧調遣滿漢大兵直抵救解茲逆孽竊踞海澄併厦金等島見與我師對壘復散遣逆艘往來游移沿邊窺犯目下官兵奔馳應援正苦不敷調撥今

內部以需餉浩繁請

勅酌量存留剿殺賊寇看守地方作何裁減之處具題等因在

王爺睿鑒自有確裁本職愚昧目擊今日山海情形雖經制官兵共有八萬七千一百餘名內除撫標官兵貼防各汛併駐防延建汀邵四府堵剿鄰寇把守關隘去兵一萬四五千名又在省水師兵二萬名又分派福寧福州興化泉州同安龍灌等處城垣臺寨要緊口岸共兵二萬餘名又彈壓固守漳郡堵防漳屬

之馬口長橋漳浦雲霄詔安城垣臺寨緊要口岸共
兵一萬餘名實在榴山寨江東橋萬松關鳳山大小
港洲以及洪澇一帶地方緊對逆踞之觀音山灣腰
樹玉洲東尾太平果塘各處現在軍前對壘只有職
標并督標福寧漳州二鎮標官兵約僅二萬餘名今
海澄尚未恢復金廈等島逆賊尚在猖獗沿海一帶
地方已經遵奉

俞旨俱照順治十八年遷定界限又須安設臺寨際此賊
勢猶盛每每乘間窺犯在在需兵防禦營營分布露
肘以職揆度今昔事勢尤須請增兵額暫資剿禦殊
不敢更議裁減貽悞邊疆卽克復海澄蕩剿逆島事
平之日大兵全撤回 京仍應額設經制綠旗官兵
八萬七千餘名方足彈壓山海地方然計每年所需
糧餉不過百十餘萬若今海賊未滅遽議裁兵將來
邊防不足固守恐糜費錢糧更無底止也本職身在
地方切念

朝廷封疆重大不得不剴切直陳是否有當統祈
王爺睿裁妥確具

題可也至於閩省原經制綠旗兵數自變亂之後本職
衙門卷案俱被海賊焚燬片紙無存難以備查惟約
畧查記原額開報營分兵數清單啓送伏祈

王爺睿鑒施行

康熙十八年六月初六日

塘報殺賊啓

爲塘報殺賊大勝事本月二十四日據本標後營遊
擊劉國興報稱本月十八夜二更時分據探兵報稱
東石僞前虎衛撥僞中協楊忠僞副將楊德帶賊衆
七百餘由船欲來深滬不知何意又據探兵報稱僞
中提督水師鎮在日湖撥賊衆六百餘駕舡欲來深
滬會合各等情據此該卑職隨一面整擗官兵聽調
外案查先爲稟報事奉本將軍憲牌前事仰職立即
多派歷練哨兵晝夜勤加瞭探仍督率馬步官兵不

時游巡護衛田禾毋使逆賊侵入盜割擾害地方并謹防奸民透越接濟本將軍身在行間鞭長莫及惟有諄諄告誡而該將身在地方務宜計出萬全等因又爲稟報事奉寧海將軍喇 令牌據卑職報前事等緣由據此本將軍現在整搦官兵聞警策應外傳牌仰職即便選歷練哨兵瞭探逆賊或係游移或係登岸賊勢多寡屯聚處所逐一確探明白呈報以憑酌奪等因本月十八日又爲稟報殺敗賊衆事奉寧海將軍喇 令牌據卑職稟報前事等緣由傳牌仰職文到即便鼓勵官兵益加奮勉再圖勦殺深滬登岸賊夥務盡根株奏功之日本將軍自當彙啓優加陞賞等因各到職奉此該卑職仰遵憲令又據前情隨會商章京鄒士道浙江督標守備劉澤深等各酌撥該標馬步官兵前去哨探隨准守備劉澤深撥左營千總常玘中營把總牛義魏衷外委紅旗把總王豹趙起祥劉天鳳左營外委紅旗把總常高帶馬兵三十名步兵一百名又准章京鄒士道撥李章京同便委章京洪柱吳文小撥什庫韓虎帶馬兵二十名

步兵一百名又撥道標守備許玉千總陳天祐把總
凌啓鳳帶步兵三百名及本營千總馬虎外委千總
董三亮原把總萬懋連便委把總王國進陳賡紅旗
伍大右營把總鄂公祿帶馬步兵二百五十名共兵
八百名於十九日五更時分前往深滬哨探果見賊
衆約有一千四百餘人屯聚深滬山下徑築月城卽
飛報到職卑職隨令守備劉澤深章京鄒士道晉江
營千總米得高等看守竿頭寨及營盤卑職親領本
營把總任可久外委千總孫起龍熊汝亨朱才便委
把總吳斌帶馬步兵一百名浙江督標中營千總孫
尚義左營外委把總劉鳴鳳戎旗外委千總喻承敬
帶馬兵二十名步兵一百名晉江營把總達養棟帶
兵一百名前去接應我兵齊集卑職隨分三路先撥
道標守備許玉千總陳天祐把總凌啓鳳帶兵三百
名分爲左路又撥浙江督標中營千總孫尚義把總
牛義魏衷署右哨把總唐魁左營千總常玘晉江營
把總達養棟共帶兵三百名分爲右路卑職統本營
千總馬虎把總任可久外委千總孫起龍熊汝亨朱

才董三亮原把總萬懋連便委把總吳斌陳賡王國
進紅旗伍大右營把總鄂公祿靖藩下李章京共帶
馬步兵五百二十名以爲中路三路夾擊自辰至未
賊見我兵奮勇砲矢齊發賊隨敗潰時陣斬賊衆一
千餘名被我兵追殺下海溺死者不計卑職射死僞
中協楊忠并生擒楊忠胞弟僞副將楊德一名及各
營官兵活擒僞官兵一十八名仍將月城推平焚燬
大小賊船七隻所有各營得獲旗幟盔甲器械并傷
亡兵丁及陣斃馬匹現在列造清冊具報其陣獲器
械旗幟及活擒賊犯就近解赴

寧海將軍發落外查此項逆賊久踞東石流毒地方
茲會合深滬希圖窺犯被我兵勦戮殆盡皆奉本將
軍指授機畧故能獲此大勝也緣係殺賊大勝理合
呈報等情到職據此爲照海逆被我在漳官兵堵困
窮迫遂散遣賊艘游移沿邊希圖窺犯掠食屢據鎮
營稟報逆賊情形業經本職會同將軍督撫嚴飭沿
邊各汛防將弁加謹隄備整棚堵剿去後茲據遊擊
劉國興報稱逆孽蟻聚深滬狂逞窺犯被我官兵三

路夾擊於本月十九日自辰至未官兵奮勇砲矢齊
發賊隨潰敗當被該將射死僞中協楊忠并生擒僞
副將楊德一名各營官兵活擒僞官兵一十八名陣
斬賊衆一千餘名追殺下海溺死者不計焚燬大小
賊船七隻得獲旗幟甲械甚多等情前來此一役也
在事各官奮勇勦殺大勝已禡逆賊窺犯之魂實仰
荷

王爺洪福之所致也其各官用命殺賊功誠難泯據報
前情除卽現在繕疏具

題外理合具啓伏乞

王爺睿鑒施行

康熙十八年六月二十五日

塘報剿賊啓

爲塘報剿賊大獲全勝事本年十月十六日據建寧
城守左營遊擊李英報稱切照江西賊首呂貴蘇亮
等率黨三千餘衆突犯崇汛北路岑陽山坳一帶地
方踞高守嶮扎立木城結蓋巢穴侵掠四鄉生靈塗
炭卑職會同崇安縣籌酌進剿隨即調集各路聯絡
鄉勇及將各汛防守官兵移緩就急量行抽調齊備
卽於九月十六日親統馳赴相機夾剿業經呈報在
案卑職隨督師駐扎陂前親往踏看地勢相度情形

以便分頭進攻驟見逆賊倚山踞險必進隘口俱有埋伏緊守官兵一時難進卽差的當目兵躡探小徑以便扒山夾剿於二十六日始據探丁回稱小的躡往躡探奈四面皆是懸岸峭壁難登直探至黃龍巖山背後見有樵徑岐路可以扳藤而進隨卽扒上山頂細看有小路四處一可通賊巢之後路一可直進賊巢之左一可直入賊巢之中更有一路由黃龍巖之側小徑扒山可透入賊巢口子之內其大路山拗岑陽一帶隘口密佈堵守甚緊實難直進等語據此該卑職隨卽商酌分路夾攻議定隨征總兵桑明率領舊標屯丁由黃龍巖扒山進攻賊巢後路議休致總兵熊鼎魁率領屯丁鄉勇協同浦城新興七畝仁風一三畝鄉練李彥英王大英等由黃龍巖扒山進攻賊巢之左議撥投誠遊擊程應榮把總吳勝等率同屯丁鄉勇扒山進攻賊巢之中行令楓嶺營千總楊得勝率領該營兵丁扒山而下夾攻嶮要塞口卑職親統本營把總呂應龍中營把總陳子龍右營把總韓國柱京口營功加署遊擊管把總事王國祥并

各營外委千把百隊兵丁由大路進剿俱各衝先截殺恢復山拘連奪逆賊五隘圍攻大破木城直抵新嶺下衝破巢穴轉戰二十餘里焚燒木城蓬寨二十六座約計殺賊七百餘級帶傷跌死者不計活擒逆賊二十餘人就地正法訖官兵奮勇自已至酉逆賊踰山越嶺大敗逃遯時因官兵力乏又值天雨黑夜難以扒山追勦暫卽收營歇息再於次日復令官兵尾踪追剿去後俟獲勝情形另文馳報除陣斬僞官得獲劄付并奪獲旗幟砲械及各營傷亡士卒馬匹以及在事有功人員另行查明彙叙塘報事關殺賊搗巢掃穴大獲全勝皆賴憲臺之威靈合先飛報等情到職據此切照鄰寇流突侵犯居民受害已極屢據該營呈請援師夾剿業荷

王爺令諭檄調官兵星赴撲剿去後茲據該遊擊報稱逆首呂貴蘇亮等率夥三千餘衆突犯崇汛北路岑陽山坳一帶地方踞險結巢分頭掠劫今於本年九月二十六日被我官兵奮勇衝殺破巢掃穴當陣斬殺逆賊七百餘級活擒二十餘人焚燒木城蓬寨二

十六座并得器械等項雖將士奮力用命實仰賴
王爺威靈遠播大獲全勝所有在事有功人員應俟其
報到之日咨會 題叙以鼓用命以昭激勸者也今
據前情理合啓報伏乞

王爺睿鑒施行

康熙十八年十月十七日

報安營啓

爲啓報安營地方以備策應夾剿情形事竊照職於
本月十六日同總督各親帶官兵自鳳山營盤起身
於十七十八兩日在烏嶼橋堡充龍堡金山白礁海
滄松嶼一帶地方追剿海寇緣由已經啓報

王爺睿鑒在案續同總督審視海滄松嶼地勢離同安
尙遠孤處海外與漳州同安各營兵馬聲息不相聯
絡不便安營於二十日同總督到灌口界外下營復
同往海邊相視形勢見高浦地方與廈門對峙水洋

甚近且與同安相隔不遠兼潯尾地方先已有賊踞
占現在屯營并有船隻往來游移意在堵我同安港
船隻與高浦只隔一港汊約有三里餘遠職與總督
相議卽於高浦安設伍營如梅花相聯多架砲火以
牽制潯尾之賊并可爲同安港八槳策應聲援俟我
舟師大艖到日便可就近夾擊逆賊商議已定總督
遂於二十一日馳回漳州調度官兵船隻預備進剿
職在高浦督令各官兵築壘挖濠伍營共安官兵五
千名俟營壘修築完日職卽馳回漳州統領兵馬進
擣海澄另具啓報外今將安營情形合先具啓伏乞
王爺睿鑒施行

康熙十九年二月二十二日

恢復海澄縣啓

爲飛報恢復海澄縣城事竊照職同總督於二月二十日親帶兵馬到同安縣所屬邊海相視形勢議於高浦地方建築營壘安設官兵防剿緣由已經啓報王爺睿鑒在案職安設布置已定卽星夜馳回漳州會同總督調遣兵馬進攻玉洲三叉河觀音山石媽等處一十九寨得獲全勝情形已經總督塘報外職於二月二十四日五鼓率領職標叅將馬勝等官兵會同平南將軍總督姚啓聖浙江提督石調聲等各帶

領滿漢官兵分作水陸三路進攻海澄逆首劉國軒復親率水師放砲堵禦偽總兵陳昌等四鎮城上施放大砲我兵奮勇齊進一面進攻一面差官直抵城下宣諭投誠內偽總兵蘇侃願意投誠而偽總兵陳昌等不肯歸順城內賊兵遂自相併殺職等督兵乘勢攻門蘇侃接引入城共殺偽兵一千一百餘名淹歿不計活擒偽總兵楊吉等一十一員當卽梟示其偽總兵陳昌等逃匿下海偽總兵蘇侃等率偽兵共二千一百八十七名投誠得獲大砲五百六十八位火藥一萬二千九百六十三觔米六百九十三石穀一千二百五十八石奪獲賊船二十七隻滿漢大兵俱於二十四日巳時入城秋毫無犯百姓安堵仍現在會議相機進取廈門逆穴以絕根株所有在事有功大小將弁職名及陣亡官兵馬匹數目容職查明另報外今將恢復海澄縣城日期理合先行啓報伏乞

王爺睿鑒施行

恢復廈門啓

爲塘報事本年二月二十八日戌時據職標中軍叅將馬勝右營遊擊李璉戎旗守備徐可成督標前營叅將劉詔後營叅將謝朋德內右營叅將謝思禮署援剿左營遊擊事馬四玉援剿右營遊擊楊懋級等報稱本年二月二十六日奉總督部院姚 昭武將軍楊 憲令着卑職等帶領各營官兵會同新到歸誠總兵官吳桂羅士珍吳天祿等官兵大小船隻於二十七日乘潮直抵廈門古浪嶼前殺敗海寇連踪

逃遯復同各官兵奮勇爭先攻擊岸上海賊當時潰
敗得獲廈門城一帶地方其餘輸誠官兵及招撫地
方兵民僞官僞兵併在事有功人員得獲器械俟查
明的實另行開報緣係恢復地方殺敗渠寇理合塘
報等情到職據此理合啓報伏乞

王爺睿鑒施行

康熙十九年二月二十九日

彙報招撫投誠啓

爲彙報招撫投誠官兵數目仰祈

睿鑒事切照我師於二月二十四日恢復海澄縣二十
七日克取廈門職隨宣佈

皇仁暨

王爺德意遍行出示招撫并差員多方接引許其就撫
自新隨材錄用隨有各僞鎮將等率領官兵眷口船
隻器械前來呈繳僞印劄投誠俱經職逐一面驗剃
髮賞給袍帽緞疋花紅銀牌移送總督安插分別入

伍歸農外所有各起投誠官兵眷口船隻器械印劄
數目理合彙造清冊啓報伏乞

王爺睿鑒施行

康熙十九年三月十三日

清查兵數啓

爲清查兵數事案奉 王爺令諭照得本親王班師

在邇所有綠旗官兵數目合行清查諭到該提卽將
福建通省綠旗官兵總數并撥防某處汛地若干某
處留防城守若干核筭的實開造清單啓送查閱爲
此特諭等因敬此該職遵將福建通省綠旗官兵除
督撫二標并分隸水師提督管轄各營不造外今將
陸路所屬各鎮協營官兵總數分別撥防沿邊縣汛
留防城守員名數目彙造清冊現在理合啓送俯乞

王爺睿鑒施行

康熙十九年六月初十日



